

Naalakkersuisut namminersortunngorsaanermut isumalioqatigiissitamik pilersitsinissaannut, pisortat suliffeqarfiit tamakkiisumik tamakkiisumiinngitsumillu pigisaannik misissueqqissaartussanik siunnersuuteqartussanillu suliffeqarfiit sorliit namminersortunngorsarnerinit iluanaaruteqartoqarsinnaaneramik suliaqartussanik aalajangiiffigisassatut siunnersuut. Misissuineq UKA 2017-mi Inatsisartunut tunniunneqassaaq

Demokraatinit saqqummiunneqartoq

pillugu

Inuussutissarsiornermut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqatigiit, siulittaasoq
 Inatsisartunut ilaasortaq Justus Hansen, Demokraatit, siulittaasup tullia
 Inatsisartunut ilaasortaq Vivian Motzfeldt, Siumut
 Inatsisartunut ilaasortaq Nikolaj Jeremiassen, Siumut
 Inatsisartunut ilaasortaq Kelly Berthelsen, Inuit Ataqatigiit

UKA2016-imi ulloq 26. oktober 2016-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Namminersortunngorsaanermut isumalioqatigiissitamik pilersitseqqullugit Naalakkersuisut peqquneqarnissaat siunnersuuteqartup siunnersuuteqarnermigut kissaatigaa. Ingerlatseqatigiiffiit Namminersorlutik Oqartussanit tamakkiisumik ilaannakortumilluunniit pigineqartut sorliit namminersortunngorsarneqarsinnaanersut pillugit kaammattuuteqarnissaq isumalioqatigiissitap anguniagarissavaa.

Siunnersuutip Inatsisartuni siullermeerneqarnera

Ingerlatseqatigiiffinnik Namminersorlutik Oqartussanit pigineqartunik namminersortunngorsaa sinnaanerup isumaliutiginnilluaqqaarnikkut pisariaqarneranik siunnersuuteqartup isumaliutigisa Naalakkersuisunit siullermeerinninnermi taparserneqarput.

Tamannali allatulaaq sulissutigineqassasoq Naalakkersuisunit kaammattuutigineqarpoq, taamaattumillu allannguutissatut siunnersuut una saqqummiunneqarluni:

Ingerlatseqatigiiffiit namminersortunngorsarneqarsinnaanerat siunertaralugu ingerlatseqatigiiffiit Namminersorlutik Oqartussanit pigineqartut tamakkiisumik ilaannakortumilluunniit namminersortunngorsarneqarsinnaanersut misissoqqissaarneqarsimanerannik imalimmik Naalakkersuisut nalunaarusiornissamut peqquneqarnissaat pillugu Inatsisartut aalajangiiffigisassaattut siunnersuut. Nassuiaat kingusinnerpaamik UPA 2018-imi Inatsisartunut saqqummiunneqassaaq.

Oqaaseqartartut assigiinngitsunik isummerput, siunnersuummilli siullermeerinninnermi Naalakkersuisut allannguutissatut siunnersuutaat amerlanerussuteqarfiuvoq. Siunnersuummut isumaqataasut oqaatigaat namminersortunngorsaasinnaaneq allannguutissatut siunnersuut naapertorlugu paasissutissanik tunngaveqarluni pisariaqartoq. Paasissutissanik tunngaveqarluni namminersortunngorsaanerup ingerlanneqarnissaanut allat nalinginnaasumik tapersiippu, tassa siunnersuutaaqqaartumut aammalu Naalakkersuisut allannguutissatut siunnersuutaannut. Namminersortunngorsaaneq ataatsimoornerusumik isigalugu oqallisigeqqaarsimatinnagu namminersortunngorsaanerumut isumalioqatigiissitamik pilersitsinissaq oqallisigineqartariaqanngitsoq siunnersuummut akerliusut oqaatigaat.

Aammattaaq siullermeerinninnermut tunngatillugu ataatsimiititaliamit oqaatigineqassaaq naammassisaqarsinnaassuseq pillugu isumalioqatigiissitamik pilersitsinissaq pillugu immikkoortoq UKA2016/143-mut peqatigitillugu aalajangiiffigisassatut siunnersuutip matuma suliarineqarnera naapertuussorinann~~gim~~mat. Aalajangiiffigisassatut siunnersuutini marluusuni “isumalioqatigiissitamik” pilersitsinissaq taaneqarmat imaangilaq siunnersuutit imarisaat ataatsimut suliarinninnissamut tunngavissiisut. Siunnersuutit taama assigiinngitsigisumik imaqartut ataatsimut suliarineqarpata siunnersuut ataaseq arlallilluunniit ataatsimooritillugit suliarineqartut ilaat Inatsisartuni suliarinninnermi pisariaqarneratut eqqumaffigineqanngitsoorsinnaavoq.

Ataatsimiititaliap siunnersuummik suliarinninnera

Aallarniutigalugu ataatsimiititaliamit oqaatigineqassaaq namminersortunngorsaaneq pisortat suliffeqarfiutaannik namminersortunut tunniussinertut nassuiarneqarsinnaammat. Suliffeqarfimmik pisortanit pigineqartumik aningaasaliisartunut namminersortunut tunisineq namminersortunngorsaanerumit alloriarnerit annersaraat. Namminersortunngorsaanerumit alloriarneq annikinnerusoq tassaavoq nioqqutissamik tunisassiornerup assersuutigalugu suliariumannittussarsiuussinikkut pisortat namminersortunut nuunneqarnera, tamatumanili nioqqutissamut tunngatillugu piumasaqaatit aammalu nioqqutissat sullississutilluunniit aningaasalersorneqarnera pisortanit suli aalajangerneqartarlutik.

Amerlasuutigut oqaatsit "namminersortunngorsaaneq" aammalu "ammanerulersitsineq" taputartuunneqartarput. Ammanerulersitsineq tassaavoq niuernermi suliaasaqarfimmik pisortanit maleruagassiuunneqartumik atorunnaarsitsineq annikillisisinerluunniit, assersuutigalugu inatsisikkut atuuttukkut aalajangersaanikkut pisortat siusinnerusukkut kisermaassiffigisimasaanni unammillernermik ammaassinikkut. Akerlianik namminersortunngorsaaneq naatsumik oqaatigalugu tassaavoq pisortat suliffeqarfiutaannik namminersortunut tunisineq, tamannali imaangilaq niuernermi suliaasaqarfimmik ammanerulersitsinermik nassataqassasoq.

Namminersortunngorsaansamut tunngavilersuutigineqakkajuppoq namminersortut piginninnerisigut tunisassiorneq annertusissasoq. Tamatuma peqatigisaanik tunisineq pisortanit iluanaaruteqaataassaaq akileraarutit appartinneqarnerannut pisortalluunniit akiitsuisa appartinneqarnerannut atorneqarsinnaasunik. Namminersortunngorsaaneq tunisassiornerup annertunerulerneranik ilumut nassataqassanersoq ilaatigut apeqqutaavoq suliffeqarfik namminersortoq nutaaq unammillerneqarnerasoq, taamaalillunilu tunisassiornerup aninertusarneqarnissaat aningaasartuutillu ikilisarneqarnissaannut tatineqarnerasoq. Pisortat kisermaassinerat namminersortut kisermaassinerannik taarserneqarpat atuisunut akit appasinnerulernissaat sullississutilluunniit pitsaanerulernissaat qulakkeerneqarsinnaangilaq, tassa suliffeqarfiup namminersortup nutaap kisermaassinerminik atorluanaanissaa ilimagineqarsinnaammat.

Taamaattumillu namminersortunngorsaaneq naapertuuttumik ingerlanneqassappat unammillertoqarnissaa pisariaqarpoq, taamaalillunilu aamma ingerlatat sorliit iluaqutissarsiffiusunut namminersortunut nuunneqarsinnaanerat killilerneqarluni.

Pisortat tunisassiornerata namminersortut tunisassiornerannit (agguaqatigiissillugu) 30 procentimik akisuneruneranik siunnersuuteqartup ilimaginninnerani unammillerfiusumi namminersortut tunisassiornerannik ilimaginninnermik aallaaveqarpoq. Taamaattumik tunisassiornerup/sullissinerup niuerfinni piviusumik unammillerfiunngitsuni kisermaassillutik namminersortunut tunniutiinnarneqarsinnaanera pillugu nalinginnaasumik isummernissaq ataatsimiititaliap paasinninnera malillugu isumaqanngilaq. Ingerlatseqatigiiffinnik Namminersorlutik Oqartussanit pigineqartunik namminersortunngorsaansamik aalajangernissaq sioqqullugu tamatuma qulaajarnissaa pingaernerpaat ilagaat.

Aammattaq namminersortunngorsaansamut piukkunnaateqarsinnaasunik nalilersuinermi ingerlatseqatigiiffiit ataasiakkaat immikkut naliliiffigineqarnissaat pingaaruteqarnerarlugu Naalakkersuisut oqarnerat ataatsimiititaliamit maluginiarneqarpoq. Taamaalillunilu assersuutigalugu inuussutissanik suliareqqitanik nunarsuarmi niuerfinni tunisineq aammalu nunatsinni innaallagissamik imermillu pilersuineq assigiinngitsorujussuupput.

Ingerlatseqatigiiffinnik Namminersorlutik Oqartussanit pigineqartunik siunissami

namminersortunngorsaasinnaanerup pisuni ataasiakkaani sukumiilluinnartumik isumaliutiginninnermik tunngaveqarnissaanik oqarneq ataatsimiititaliap tunngaviatigut tapersersinnaavaa. Tassungaa atatillugu nassuiaammik saqqummiussinissamik Naalakkersuisut allannguutissatut siunnersuutaat Namminersorlutik Oqartussat aktiaateqarluni ingerlatseqatigiiffii pillugit nassuiaammut Inatsisartunut ukiumoortumik tunniunneqartareertumut tapertaalluarsinnaasutut ataatsimiititaliamit isigineqarpoq. Taamaalillunilu ingerlatseqatigiiffiit namminersortunngorsarneqarsinnaanerat pillugu nassuiaat ingerlatseqatigiiffiit pillugit nassuiaammut ilanngunneqarnissaa aammalu namminersortunngorsaanerumut tunngasortaata ukiut allortarlugit nutarterneqartarnissaa ataatsimiititaliamit kissaatiginartinneqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffissornikkullu kingunerisassat siunnersuummut tunngavilersuummi nassuiarneqartassasut Inatsisartut suleriaasianni § 33, imm. 1-imi allassimavoq. Isumalioqatigiissitamik pilersitsinermi aningaasartuutit 2,4 mio. kr.-inik annertussuseqarsinnaasut siunnersuuteqartumit naatsorsuutigineqartoq ataatsimiititaliamit maluginiarneqarpoq, tamatumani aallaavigineqarlutik saammaateqatigiinnissamut isumalioqatigiissitamit misilittakkat. Allannguutissatut siunnersuut saqqummiunneqartoq sulisutigut aningaasatigullu atorneqartussatut naatsorsuutigisanut qanoq sunniuteqassanersoq Naalakkersuisunit paasissutissiissutigineqanngilaq, ataatsimiititaliamilli naatsorsuutigineqarpoq nassuiaammik suliaqarneq aningaasat taaneqartut 2, 4 mio. kr.-it atorlugit ingerlanneqarsinnaasoq. Tamatuma saniatigut nassuiaatip ingerlaavartumik nutarterneqartarneranut aningaasartuuteqartoqartassaaq, taakkulu naalakkersuisoqarfimmut suliaasaqarfimmut akisussaasumut aningaasaliissutaasunit akilerneqarsinnaassasut naatsorsuutigineqarpoq.

Ataatsimiititaliap inassuteqaatai

Ataatsimiititaliap **isumaqatigiittup** Naalakkersuisut allannguutissatut siunnersuu
akuerineqassasog inassutigaa.

Taama oqaaseqarluni isumaliutissiissumilu allassimasutut paasinnilluni ataatsimiititaliap siunnersuut aappassaaniigassanngortippaa.

Mimi Karlsen,
Siulittaasoq

Justus Hansen
Siulittaasup tullia

Vivian Motzfeldt

Nikolaj Jeremiassen

Kelly Berthelsen